

L Museo à compì 10 egn

La neva senta enaudèda del 2001 l'é na vedrina che moscia en curt i resultac de passa 30 egn de studies e enrescides e n pont de referiment prezios per la didatica

Sèn Jan - L'à inom "N liber te museo" una de la scomenzadives pissèdes dal Museo ladin per ge sporjer na cercia de noscia cultura a chi che rua chiò d'istà e a noscia jent che vel se n emprevaler: 4 scontrèdes per rejonèr de publicacions vegnudes fora te chisc ùltime tempes. Tel prum apuntament la scritora Brunamaria Dal Lago Veneri à prejentà so liber "L ream de Fanes", dat fora da l'Istitut ladin en coedizion con la Giunti Progetti, e chesta l'é stat l'ocasion ence per rejonèr mingol del Museo, che aea enaudà sia neva senta giusta acà 10 egn.

L regn de Fanes

La produzion de Fanes – à dit l diretor Fabio Chiocchetti – speia la vida de lurèr de l'Istitut: n projet peà via dal patrimoni de scric de Hugo de Rossi, che dò n lurier de studie e enrescida vegn lurà fora col lengaz atual da anchecondi, compagnà da dessegnes dal trat modern e "sgrafient", de Fabio Visintin e da la museghes de Susy Rottonara (tel cd che compagna l liber), per ruèr a la fin al prodot de maor divulgazion, l dvd a dessegnes animé te cater lengac, destinà ence a la scoles e a la didatica, per otimisèr i sforç e ruèr daperdut olache l'é meso, ence travers la televizion, olache chest dvd é jit fora compagnà dai comenc de l'autora e de la prof.a

Ulrike Kindl, componenta de la Comiscion culturala de l'ICL, che à spiegà l'emportanza de n poem epich per n popol. "I poemes epiches – à dit Brunamaria Dal Lago Veneri – segna i gregn mudamenc de n popol, chel de Fanes conta l passaje da n veior ream de pèsc a un de vera. L'é l più emportant de la Dolomites, ensema a chel de Re Laurin che segna l'invajon di foresc che rua a rompir l fil de seida.

Chela de Fanes l'é na lejenda veiora che conta fac che i é te nosc DNA, ma semper atuala se la troa jent che la propon endò a na vida moderna e enteressanta. Gé é chierì de durèr n lengaz che ge vae dò a la narazion a ousc, e é aprijà n muie la gran atenzion metuda da l'Istitut e da so Comitad scintifich tel vardèr fora ogni particulèr, tant di scric che di bie dessegnes de Fabio Visintin, acioche dut sie senza fai. Spere che l dvd posse envièr la jent a se lejer ence l liber."

L Museo Ladin

Per recordèr i 10 egn de la neva senta del Museo l'é ruà te Fascia ence l'antropologh Cesare Poppi, che à lurà a sia concezion fin dal scomenz, e i architec Alberto Winterle e Lorenzo Weber, che i à studià fora i alestiment de la neva senta sot la vida de Ettore Sottsass Junior. Acà passa 30 egn Poppi, col diretor Fabio Chiocchetti, aea tacà

a studièr fora "co" fèr te Fascia n museo vif e leà a sia tera. "Enlouta – à dit l'antropologh – sion stac i prumes, con la Sia de Penia, a pissèr a n "museo sul teritorie", che ades veit neva prospetives con la Mèlga de Fascia e fosc con autra sezions desche la vera e l'alpinism, se l'é l'enteress di amministradores.

L Museo no l'é demò na esposizion de materièi, ma la vedrina de n conzet e de percorsc e enrescides fates dal Istitut, che te chisc diès egn i à seghit a jir inant. Un di ponc de forza de chesta istituzion l'é apontin l leam anter Istitut e Museo, anter n muion de

ativitèdes, che va da l'enrescida a la manifestazions, da la produzion de publicazions a la formazion de studenc e de jent che laora tel setor de la cultura e de la didatica."

En cont de la didatica é intervegnù - ence a inom de la Sorastanta - l responsabol de l'Olfed de la Scola de Fascia Vigilio Iori, che à sotlineà soraldut l'emportanza de la formazion per la didatica e de n bon coordinament con i servijes educatives del museo, e n salut e l deelpai per l lurier portà inant l'é ruà ence da man de la Procuradora Cristina Donei. Su la prospetives per l davegnir del Museo à rejonà l

president de l'Istitut Ladin Antone Polam, che, dò aer recordà l'emportanza del lurier portà inant da chesta istituzion, l'à reingrazià l diretor e dut l staff e envià i fascegn a cognoscer e recognoscer de più chel che vegn fat, che somea aer maor aprijament dai foresc che da noscia jent. Polam à ence anunzià che - dò aer mudà fora la sales de la modernità - l Museo à en program de se smaorèr per aer na sala per esposizions temporanes olache se posse meter fora e fèr cognoscer la coleziions e i materièi che no troa lèrga te la sales espositives. (lg)



Na viva ai 10 egn del Museo Ladin da man di ideatores (da man dreta): Chiocchetti, Poppi, Winterle e Weber, con l president de l'Istitut ladin Antone Polam.



La scritora Bruna Maria Dal Lago Veneri à prejentà l liber "L regn de Fanes"